

ԱՇԽԱՏԱԿԱՐԳ

ՏՆՏԵՍԱԿԱՆ ՔԱՂԱՔԱԿԱՆՈՒԹՅԱՆ ԽՈՐՀՐԴԻ

1. ԸՆԴՀԱՆՈՒՐ ԴՐՈՒՅԹՆԵՐ

1. Սույն աշխատակարգը կարգավորում է տնտեսական քաղաքականության խորհրդի (այսուհետ՝ նաև՝ խորհուրդ) աշխատանքների կազմակերպման և գործունեության հետ կապված հարաբերությունները:

2. Խորհուրդն իր գործունեության ընթացքում ղեկավարվում է Հայաստանի Հանրապետության օրենսդրությամբ և սույն աշխատակարգով:

3. Խորհուրդը բաղկացած է Հայաստանի Հանրապետության և միջազգային հեղինակություն ունեցող օտարերկրյա ականավոր գիտնականներից, հասարակական գործիչներից, փորձագետներից և Հայաստանի Հանրապետության վարչապետի որոշմամբ նշանակվող այլ անձանցից:

4. Պետական մարմինների ներկայացուցիչներն իրենց ղեկավարած գերատեսչության լիազորություններին առնչվող հարցերի քննարկման շրջանակներում խորհրդի նախագահի հրավերով կարող են մասնակցել խորհրդի նիստերին:

5. Խորհրդի անդամներն իրենց գործառույթները կատարում են անհատույց կարգով:

6. Խորհրդի անդամներն իրենց պարտականությունները կատարելիս անկախ են և չեն կարող ստանալ ցուցումներ պետական մարմիններից կամ պաշտոնատար անձանցից:

7. Խորհրդի անդամները որևէ քաղաքական կամ մասնավոր ուժի կողմից չեն կարող ուղղորդվել կամ վերահսկվել, ինչպես նաև իրենց աշխատանքային պարտականություններն իրականացնելիս պետք է ձեռնպահ մնան ուղղակի կամ անուղղակի ձևով արտահայտելու որևէ քաղաքական կամ մասնավոր ուժերի շահեր:

2. ԽՈՐՀՐԴԻ ՆՊԱՏԱԿԸ ԵՎ ԳՈՐԾԱՌՈՒՅԹՆԵՐԸ

8. Խորհրդի նպատակն է Հայաստանի Հանրապետության սոցիալ-տնտեսական իրավիճակի վերաբերյալ համապատասխան առաջարկությունների, նախագծերի մշակումը և դրանց ներկայացումը Հայաստանի Հանրապետության վարչապետին:

9. Իր գործառույթների շրջանակներում խորհուրդը կարող է դիմել Հայաստանի Հանրապետության պետական մարմիններին, տեղական ինքնակառավարման մարմիններին և այլ կազմակերպություններին՝ իր գործունեության համար անհրաժեշտ տեղեկատվություն, վերլուծական նյութեր և այլ փաստաթղթեր ստանալու համար, եթե Հայաստանի Հանրապետության օրենսդրությամբ այլ բան նախատեսված չէ:

3. ԽՈՐՀՐԴԻ ԿԱԶՄԸ ԵՎ ԳՈՐԾՈՒՆԵՌՈՒԹՅԱՆ ԿԱԶՄԱԿԵՐՊՈՒՄԸ

10. Խորհուրդը բաղկացած է խորհրդի նախագահից, խորհրդի նախագահի տեղակալից (գործադիր քարտուղար) և խորհրդի անդամներից:

11. Խորհրդի աշխատանքների արդյունավետությունն ապահովելու նպատակով ձևավորվում է աշխատանքային խումբ:

12. Խորհրդի նախագահը Հայաստանի Հանրապետության վարչապետն է:

13. Խորհրդի նախագահը՝

1) ղեկավարում է խորհրդի աշխատանքները.

2) վարում է խորհրդի նիստերը.

3) նշանակում է խորհրդի նիստի անցկացման օրը, ժամը և վայրը.

4) ստորագրում է խորհրդի նիստի արձանագրությունները.

5) հրավիրում և անցկացնում է խորհրդակցություններ՝ խորհրդի գործունեությանը վերաբերող հարցերի լուծման համար.

6) կարող է հրավիրել առանձին մասնագետների խորհրդի նիստին մասնակցելու համար.

7) իրականացնում է Հայաստանի Հանրապետության օրենսդրությամբ և սույն կանոնադրությամբ իրեն վերապահված այլ գործառույթներ:

14. Խորհրդի նախագահի տեղակալը՝

- 1) կազմակերպում է խորհրդի գործունեությունը.
- 2) իրականացնում է խորհրդի նախագահի՝ խորհրդի աշխատանքի կազմակերպմանը վերաբերող հանձնարարականները.
- 3) խորհրդի հաստատմանն է ներկայացնում նիստի օրակարգի նախագիծը.
- 4) խորհրդի կազմի փոփոխման վերաբերյալ առաջարկություն է ներկայացնում խորհրդի նախագահին.
- 5) իրականացնում է Հայաստանի Հանրապետության օրենսդրությամբ և սույն կանոնադրությամբ իրեն վերապահված այլ գործառույթներ.

6) խորհրդի նախագահի հանձնարարությամբ կարող է վարել խորհրդի նիստը:

15. Խորհրդի անդամները՝

- 1) մասնակցում են խորհրդի աշխատանքներին.
- 2) իրավասու են ծանոթանալ օրակարգային հարցերի ընթացքի և արդյունքների վերաբերյալ խորհրդի աշխատակազմում առկա նյութերին ու խորհրդի նիստերի արձանագրություններին.
- 3) խորհրդի նիստից առաջ կարող են առաջադրել հարցեր խորհրդի նիստի օրակարգում ընդգրկելու նպատակով, ինչպես նաև հայտնել իրենց կարծիքն օրակարգի մասին.
- 4) կարող են դուրս գալ խորհրդի կազմից՝ դրա մասին առնվազն նիստի գումարման օրից մեկ ամիս առաջ գրավոր դիմում ներկայացնելով խորհրդի նախագահին.
- 5) իրականացնում են նաև Հայաստանի Հանրապետության օրենսդրությամբ և սույն կանոնադրությամբ իրենց վերապահված այլ գործառույթներ:

16. Խորհուրդն իր իրավասությունների սահմաններում պարբերաբար անցկացնում է նիստեր նախապես որոշված օրակարգով հաշվի առնելով խորհրդի անդամների առաջարկությունները:

17. Խորհրդի նիստն անցկացվում է հայերենով, սակայն, անհրաժեշտության դեպքում, խորհրդի նախագահի որոշմամբ կարող է անցկացվել ռուսերենով կամ անգլերենով՝ միաժամանակ ապահովելով մյուս լեզուների համաժամանակյա թարգմանություն:

18. Նիստի օրակարգն ու առնչվող կից նյութերը եռալեզու՝ հայերեն, ռուսերեն և անգլերեն տարբերակներով ուղարկվում են խորհրդի անդամներին նիստից ոչ ուշ, քան մեկ ամիս առաջ:

19. Խորհրդի առաջին նիստը գումարվում է խորհրդի ստեղծման պահից՝ եռամսյա ժամկետում: Խորհրդի նիստերը գումարվում են խորհրդի նախագահի կամ խորհրդի անդամների նախաձեռնությամբ, ըստ անհրաժեշտության, բայց ոչ պակաս, քան վեց ամիսը մեկ անգամ: Խորհրդի նախագահը, խորհրդի աշխատանքային խմբի առաջարկությամբ, որոշում է խորհրդի նիստի անցկացման վայրը, օրը և ժամը:

20. Խորհրդի նիստի օրակարգային հարցերի վերաբերյալ կազմվում է արձանագրություն, որն ստորագրում է նիստը նախագահողը:

21. Խորհրդի աշխատանքի արդյունքում ձևավորված առաջարկներն ընդունվում են նիստը վարողի հրապարակմամբ, որոնք կարող են օգտագործվել Հայաստանի Հանրապետության կառավարության ծրագրերի նախագծերի, ինչպես նաև ռազմավարական այլ փաստաթղթերի մշակման համար:

22. Խորհրդի կողմից ներկայացված առաջարկությունները կարող են հրապարակվել Հայաստանի Հանրապետության վարչապետի պաշտոնական կայքէջում:

23. Խորհրդի գործունեության կազմակերպչատեխնիկական հարցերն ապահովվում են Հայաստանի Հանրապետության վարչապետի աշխատակազմի (խորհրդի քարտուղարություն) կողմից:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏԻ ԱՇԽԱՏԱԿԱԶՄԻ
ՂԵԿԱՎԱՐ

Ա. ՀԱՐՈՒԹՅՈՒՆՅԱՆ